

Proširenje proizvodnje, modernizacija i upošljavanje usloveli da Koteks bude prepoznatljiv brend

03.02.2021. Izvor: Akta.ba



Vrhunski kvalitet kože, stručna izrada, moderan dizajn i funkcionalnost proizvoda elementi su koji određuju proizvodnju kompanije Koteks iz Tešnja, koja na ovim prostorima postoji 25 godina. Prvobitni biznis bio je izvoz sirove kože za zemlje Evropske unije, međutim, kako je posao napredovao otvorile su se nove mogućnosti.

"Od 2001. godine osnovali smo proizvodnju kožne konfekcije i kožne galanterije. Od 2006. godine počeli smo sa razvojem vojne opreme, opreme za security službe. Osim kože uvrstili smo i tekstil. Bavimo se i proizvodnjom specijalnih prsluka za vojsku, visokog stepena zaštite", kazala je Adisa Karahodžić, direktorica kompanije Koteks d.o.o. Tešanj.

Koteks trenutno upošljava oko 140 radnika. Izvozno su orijentisana firma, a 90 posto njihovog prometa je izvoz. Njihove proizvode možete naći širom zemalja Evropske unije.

"Mi uglavnom izvozimo. Kada je u pitanju proizvod sirova koža tu su nam glavni kupci Italija i Njemačka, u nekom dijelu i Slovenija. Mi smo direktni izvoznici za velike kožare koje se bave automobilskom industrijom i kožare koje prerađuju kožu za torbe i obuću. Kada je u pitanju proizvodnja i konfekcija najveći su nam kupci u Njemačkoj, Austriji i Sloveniji", naglasila je Karahodžić.

Proširenje proizvodnje, modernizacija opreme i upošljavanje novih radnika uslovalo je da Koteks na tržištu bude prepoznatljiv brend. No, to ne bi bilo moguće bez sredstava Razvojne banke Federacije BiH koja im je odobrila kredit

"Mi smo dio sredstava uložili u modernizaciju opreme, dio sredstava u pogon proizvodnje. Proširili smo proizvodnju, broj mašina i radnika od 2016. godine", kazala je direktorica kompanije Koteks d.o.o. Tešanj.

"Imamo priliku da svjedočimo da u hali koja je finansirana iz sredstava Razvojne banke rade dvije linije, jedna za Sloveniju, a druga za Njemačku. Tešanj kao poduzetnički prepoznatljiva sredina i Koteks kao lider kada je u pitanju koža i sve što se može napraviti od kože je veliki izvoznik i mogu slobodno reći jedan uspješan poslovni primjer kada je u pitanju privreda Federacije BiH", naglasio je dr. sc. Semir Fejzić, v.d. predsjednika Uprave Razvojne banke Federacije BiH.

Vizija Koteksa je biti vodeća industrija kože u Bosni i Hercegovini s ciljem proizvodnje visokokvalitetnih proizvoda i stvaranje novih vrijednosti, što se planira postići primjenom moderne tehnologije, zadovoljavanjem i unaprjeđivanjem ekoloških standarda u skladu s održivim razvojem, stvaranjem kvalitetne i obrazovane radne snage, pravovremenim i odgovornim ispunjavanjem obveza prema dobavljačima i kupcima, ali i saradnjom sa Razvojnou bankou Federacije BiH, koja im je vjerni saputnik u zamišljenim ciljevima.